

Cietduennugx Yienh Lungzcouh: Faengxraemxdaeuh Homfwt Ruzlungz Beij Vad Vaiq

粽香满城龙舟竞渡的龙州县端午节

□ Causinh Youjcaiz ingj Sinhyungz hoiz

Ruzlungz bongh vaij lumj naq mbin, mbouj faen sawhingz lij aeu buek.



▲ Ciengj gonq lau laeng haenqrenz vad, diuzcauh ngudnged yiengj mbouj dingz.



▲ Bouxlaux caemh okrenz, yaek ceng aeu daih' it.



▲ Buek rengz vad baenaj, ruz lumj naq bonghrat.



▲ Ndaw doih ruzlungz miz mehmbwk, yienznaeuz dwgrenz buek mbat ndeu.



▲ Buek rengz hingz daih' it, mbouj vit naj vunzmbanj.



▲ Gwnz dah ruz bej vaiq, vunzlai henz kama yawi.



▲ Faengxraemxdaeuh homfwt, nyex dwk vunz myaiz raengh.



▲ Humx youq haenzdah caj ruz daeuj, hemq sing gayouz dem faenh angq.



▲ Gwnz dah ruzlungz bongh, henz hamq Fwen-cuengh hap.



▲ Henz dah baij daizfwen, sing hapwenz rogdoengh.

Angq hoh cietduennugx, ruzlungz bej vad vaiq. Ndawbiengz Yienh Lungzcouh fungsug sibgvenq gvaq cietduennugx hwnghoengh, moix bi mboengq ndwennugx co'ngux, vunzlai cungj gag doxiu doxcomz dwk banh ruzlungz bej vad vaiq, suek faengxraemxdaeuh daengx ranz vunz gwn, ngoenzciet hoenghhwd vunzlai angqyangz.

Ngoenz duennugx, Yienh Lungzcouh ndawsingz lajmbanj ranzranz cungj baek nyego'ngaih, varuzlungz daengj hwnj gwnz douhung bae; vunzchung lij raek aen bauhom aeu vaj caeuq sienq lai saek neuj baenz haenx hwnj najaek lwnyeyz, yungh daeuj fuengzre binghdwgliengz riuzhengz. Cawz gij fungsug conzdungj neix le, vunz Lungzcouh gvaq cietduennugx, ceiq maqmuengh caemhcaiq ceiq haengj guh haenx dwg bae Sangginh Yangh yawj ruzlungz doxdax lo.

Sangginh Yangh dwg aen mbanjraemx mizmingz ndeu, Dahcojgyangh con lae gvaq ndaw yangh, moix bi cietduennugx, Cunh Songhamq caeuq Mbanjhozbau Cunh

Cunghsanh cungj faenbied banh ruzlungz doxdax, hawj cietduennugx henzguk dem le haujlai nauhyied caeuq angqyangz.

Ngoenz cietduennugx haetromh, saisai mbwkmbwk, lauxlaux nyaeq-nyaeq, cangndang gyaeuget lai saek lai yiengh, baenz bang baenz doih angqvauvau dwk foedfoed nangh-nangh caenx daengz song hamq dah Dahcojgyangh rangh Sangginh Yangh, caenh raen song haenzdah vunz cien vunz fanh, miz ndwn miz maeuq miz naengh, mbanj lwnyeyz caeuq daegmbauq lij benz hwnj gwnz go faex hung henz dah, daj gwnz sang yawj coh gwnz dah. Ndaw dah miz geijcib aen ruzlungz raezrengh gaebged haenx aen nem aen baiz dwk cajdeq roengzlingh. Sing sauq baez yiengj geiznding baez vad, ruzlungz couh lumj diuznaq nyingz okbae nei, ciengj gonq lau laeng dwk bonghvaij baenaj. Bouxvadruz riengz sing laz vaiqmenh haenqrenz yinzred vad ruz, song mbiengj ruz diemjraemx sinz mbin, bouxvadruz loq raen loq mbouj raen, lumj maxbang bonghbuet; bouxroqlaz

cix engq angq raeuh, fwngzswix riuj laz fwngzgvaz gaem faexroq caenhrengz roq laz, caenh siengj roq ndaej vaiq di bouxvadruz vad ndaej vaiq di rengz di. Gyoengqvunz gwnz haenzdah engq sim'angq, haenqrenz bekwngz ha hemqswenj ha, bang aen ruzlungz ndaw mbanj, diuzgai bonjfaenh gyayouz, gij yienghsiengq de couh lumj gyoengq bouxcoz ndiepgyaez boux mingzsingh nei, bek dwk fwngz byangj hemq dwk hoz hep liux lij mbouj nyienh dingz roengzdaej, sing gyukgyadgyad lumj byajraez hongxhap, ciengzmienh nauhyied hoenghhwd.

Ngoenz cietduennugx, Sangginh Yangh cawz banh vad ruzlungz doxdax le, ndaw mbanj lij cingj canghfwen daeuj doiq fwen, yinx gyoengqvunz gyaez fwen daegbied gyoengq vunzlaux humx yawj, canghfwen mwngz eu gou doiq, mwngz coenz gou hot, raen maz eu maz, hopheux gij vunz gij saeh ndaw mbanj caenhcingz doiq fwen, hawj vunzlai dingq dwk dawz sim dawz hoz, bek fwngz angq riu, angqyangz dangqmaz.